

五彩軟帶乃伊國之尊官法師中朝之賜衣也言語不同中華食牛羊肉而飲酒番物名不一志載惟足力麻鐵力麻氍毹三種而自蜀人言者有曰細毹工部氍毹絨邊工毹姜納大貨貼裡綿惟憑粗細顏色以定價值

川扇不知起自何時然李德裕有畫桐花鳳扇賦云未若繪茲禽於素扇動涼風於羅薦則唐時已嘗製之竹本蜀所富有不甚堅厚紙則出嘉州彭縣輕細柔薄雅可製扇是其來已非一日矣諸葛鼓乃銅鑄者其形圓上寬而中束下則敞口大約若今橙斗之倒置也面有四水獸四周有細花紋其色不甚碧綠擊之彭彭有聲如鼓云置於水擊之其聲更鉅青城在灌縣西南八十里玉匱經云黃帝封爲五岳丈人乃嶽瀆上司諸仙崇秩天下有三十六洞天此其第五上有流泉懸樹一日六時洒落謂之朝泉天倉諸峯三十有六前十八謂之陽後十八